

UPMKB kungsi penemu betanam enggau peranak menua pesisir nengah kus SULAM

BINTULU: Program bekungsi penemu chara nanam jagung, sayur, utai tumbuh kena ngias, chara ngurus kebun buah sereta pengelikon operasyen ngena rachun indu utai udah diatur untkup peranak menua pesisir di Rumah Meikle Ding Sungai Sekutan, Sebauh ditu, apin lama.

Program Inovasyen Betanam Betupi Meruan ari baruh kus 'Service-Learning Malaysia University for Society' (SULAM) ti diatur nembiaik Kus CES2241 (Pengembangan Pertanian) Diploma Pengurusan Perladangan dan Makanan Semester Kelima Sesi Akademik 2023/2024 Universiti Putra Malaysia Kampus Bintulu (UPMKB).

SULAM iya nya chara 'belajar bepelasarka servis' ti bisi tiga komponen berguna dipegulai iya nya akademik,

komuniti sama ngambi bagi enggau peneleba praktrikal nembiaik.

Nembiaik mega bisi ngambi bagi dalam aktiviti servis komuniti enggau pemerindang main asal begulai enggau komuniti rumah panjai.

Direktor program ti mega nembiaik universiti nya, Eleckster Dayat Jeki madahka, program nya meri empas positif kena ngangkatka kompentensi diri baka pengelandik rama.

Ku iya, program nya ulih ngangkatka pengelandik komunikasyen, tanggung pengawa rama, ulih meretika pemayuh jalai pengarap enggau budaya, nambahka efisyen diri enggau motivasyen nembiaik nya empu.

Tuai Rumah Meikle Ding berterima kasih ngagai Jabatan Sains Tanaman UPMKB

kelebih agi ngagai bala nembiaik UPMKB laban udah milih rumah panjai iya alai ngatur program nya.

Iya enggau temegah ati deka ngangkatka rumah panjai nya nyadi platform alai ngatur program ti sebaka jemah ila.

Penyanding penemu program ti nyadi pengelichakus nya, Dr Franklin Ragai Kundat madahka, chara ngajar bepelasarka SULAM deka meri peluang ngagai nembiaik belajarka mayuh pekara ti bisi enggau nyadi dalam komuniti.

Ku iya, nya ulih dikumbai belajar bepelasarka peneleba sereta nempa chara belajar dua chara antara nembiaik enggau komuniti.

Iya temegah ati program nya mujur sereta ngarapka ulih ngatur program ti sama dudi hari.